

20110511420

L I G J
PËR PLOTËSIMIN E LIGJIT PËR TË DREJTËN E AUTORIT DHE
TË DREJTAT E PËRAFËRTA

Neni 1

Në Ligjin për të drejtën e autorit dhe të drejtat e peraferta ("Gazeta Zyrtare e Republikës së Maqedonisë", numer 115/10), pas nenit 151 shtohet nen i ri 151-a, si vijon:

"Procedura në rast të mosmiratimit të aktvendimit

Neni 151-a

(1) Nëse Ministria e Kulturës nuk e miraton aktvendimin për dhënien e lejes, përkatësisht nuk e refuzon kërkesen për dhënien e lejes në afatin e përcaktuar në nenin 149 të këtij ligji, parashtruesi i kërkesës ka të drejtë që në afat prej tri ditëve të punës të parashtojë kërkesë në sekretarinë e ministrit të Kulturës, që ai të miratojë aktvendim.

(2) Formen dhe përmbajtjen e formularit të kërkesës nga paragrafi (1) i këtij neni, i përcakton ministri i Kulturës.

(3) Ministri i Kulturës është i obliguar që në afat prej pesë ditëve të punës nga dita e parashtrimit të kërkesës nga paragrafi (1) i këtij neni në sekretarinë e ministrit të Kulturës, të miratojë aktvendim me të cilin kërkesa pranohet ose refuzohet. Nëse ministri nuk ka sekretari, kërkesa parashtrohet në sekretarinë e Ministrisë së Kulturës.

(4) Me kërkesën për miratimin e aktvendimit nga paragrafi (1) i këtij neni, parashtruesi i kërkesës dorëzon kopje të kërkesës nga neni 149 i këtij ligji.

(5) Nëse ministri i Kulturës, nuk miraton aktvendim në afatin nga paragrafi (3) i këtij neni, parashtruesi i kërkesës ka të drejtë që ta njoftojë Inspektoratin Shtetëror Administrativ në afat prej pesë ditëve të punës.

(6) Inspektorati Shtetëror Administrativ është i detyruar që në afat prej dhjetë ditësh nga dita e pranimit të njoftimit nga paragrafi (5) i këtij neni, të kryejë mbikëqyrje në Ministrinë e Kulturës nëse është zbatuar procedura në pajtim me ligjin dhe në afat prej tri ditëve të punës nga dita e mbikëqyrjes së kryer, ta njoftojë parashtruesin e kërkesës.

(7) Inspektori pas mbikëqyrjes së kryer në pajtim me ligjin, miraton aktvendim me të cilin e ngarkon ministrin e Kulturës që në afat prej dhjetë ditësh të vendosë për kërkesen e parashtruar, përkatësisht ta pranojë apo refuzojë kërkesen dhe ta njoftojë Inspektoratin Shtetëror Administrativ për aktin e miratuar. Me njoftimin dorëzohet kopje nga akti me të cilin ka vendosur për kërkesën e parashtruar.

(8) Nëse ministri i Kulturës nuk vendos në afatin nga paragrafi (7) i këtij neni, inspektori do të paraqesë kërkesë për ngritjen e procedurës kundërvajtëse për kundërvajtje të përcaktuara në Ligjin për inspeksionin administrativ dhe do të përcaktojë afat plotësues prej pesë ditëve të punës, në të cilin, ministri i Kulturës do të vendosë për kërkesën e parashtruar për çfarë në afatin e njëjtë do ta njoftojë inspektorin për aktin e miratuar. Me njoftimin dorëzohet kopje nga akti me të cilin ka vendosur për kërkesën e parashtruar. Inspektori në afat prej tri ditëve të punës e informon parashtruesin e kërkesës për masat e ndërmarra.

(9) Nëse ministri i Kulturës nuk vendos edhe në afatin plotësues nga paragrafi (8) i këtij neni, inspektori në afat prej tri ditëve të punës do të parashtojë kallëzim te prokurori publik kompetent dhe në atë afat e informon parashtruesin e kërkesës për masat e ndërmarra.

(10) Nëse inspektori nuk vepron për njoftimin nga paragrafi (5) i këtij neni, parashtruesi i kërkesës në afat prej pesë ditëve të punës ka të drejtë që të parashtojë kundërshtim në sekretarinë e drejtorit të Inspektoratit Shtetëror Administrativ. Nëse drejtori nuk ka sekretari, kërkesa parashtrohet në sekretarinë e selisë së Inspektoratit Shtetëror Administrativ.

(11) Drejtori i Inspektoratit Shtetëror Administrativ është i obliguar që në afat prej tri ditëve të punës nga dita e pranimi ta shqyrtojë kundërshtimin nga paragrafi (10) i këtij neni dhe nëse konstaton se inspektori nuk ka vepruar për njoftimin e parashtruesit të kërkesës nga paragrafët (6) dhe (7) të këtij neni, ose nuk paraqet kallëzim në pajtim me paragrafët (8) dhe (9) të këtij neni, drejtori i Inspektoratit Shtetëror Administrativ do të paraqesë kërkesë për ngritjen e procedurës kundërvajtëse për kundërvajtje të përcaktuar në Ligjin për inspeksionin administrativ për inspektorin dhe do të përcaktojë afat plotësues prej pesë ditëve të punës, në të cilin inspektori do të kryejë mbikëqyrje në Ministrinë e Kulturës nëse është zbatuar procedura në pajtim me ligjin dhe në afat prej tri ditëve të punës nga dita e mbikëqyrjes së kryer, ta informojë parashtruesin e kërkesës për masat e ndërmarra.

(12) Nëse inspektori nuk vepron edhe në afatin plotësues nga paragrafi (11) i këtij neni, drejtori i Inspektoratit Shtetëror Administrativ do të paraqesë kallëzim te prokurori publik kompetent kundër inspektorit dhe në afat prej tri ditëve të punës do ta informojë parashtruesin e kërkesës për masat e ndërmarra.

(13) Në rastin nga paragrafi (12) i këtij neni, drejtori i Inspektoratit Shtetëror Administrativ, menjëherë, e më së voni në afat prej një dite pune do të autorizojë inspektor tjetër që ta kryejë mbikëqyrjen menjëherë.

(14) Në rastet nga paragrafi (13) i këtij ligji, drejtori i Inspektoratit Shtetëror Administrativ në afat prej tri ditëve të punës e informon parashtruesin e kërkesës për masat e ndërmarra.

(15) Nëse drejtori i Inspektoratit Shtetëror Administrativ nuk vepron në pajtim me paragrafin (11) të këtij neni, parashtruesi i kërkesës ka të drejtë që të parashtojë kallëzim te prokurori publik kompetent në afat prej tetë ditëve të punës.

(16) Nëse ministri i Kulturës nuk vendos në afatin nga paragrafi (9) i këtij neni, parashtruesi i kërkesës ka të drejtë të ngritë kontest administrativ në gjykatën kompetente.

(17) Procedura në Gjykatën Administrative është urgjente."

Neni 2

Akti nënligjor i paraparë me këtë ligj do të miratohet në afat prej 15 ditësh nga dita e hyrjes në fuqi e këtij ligji.

Pas botimit të aktit nënligjor nga paragrafi 1 i këtij neni në "Gazetën Zyrtare të Republikës së Maqedonisë", ai menjëherë, e më së voni në afat prej 24 orësh publikohet në ueb faqen e Ministrisë së Kulturës.

Neni 3

Procedurat për marrjen e lejes për menaxhim kolektiv, të filluara para ditës së hyrjes në fuqi të këtij ligji, do të perfundohen sipas Ligjit për të drejtën e autorit dhe të drejtat e përafërta ("Gazeta Zyrtare e Republikës së Maqedonisë", numër 115/10 dhe 140/10).

Neni 4

Ky ligj hyn në fuqi në ditën e tetë nga dita e botimit në "Gazetën Zyrtare të Republikës së Maqedonisë".